

中書典古

漢紀之齊

吳興劉氏
嘉業堂刊

序

六部卿寺皆有堂屬中書無所謂堂屬宰相雖尊舍人雖卑稱謂以師生而止有畫諾無說堂也宰相不得頤指氣使舍人不肯脅肩諂笑事必統於王言道必由於天憲所以抑旁落之權而重絲綸之掌也七卿以及百司皆鑄印而宰相獨無印印惟典籍司之發科鈔記檔案支俸薪請誥敕不盡關白於宰相所以優閑養老隆公孤之敬大臣不親細事也部寺皆有枝官中書獨無枝官六部有司務宗人府都察院通政司有經歷詹事府國子監有典簿翰林院有孔目待詔中書之典籍卽以舍人之俸深者充之一事權而嫻典故所以


表丹地之清嚴峻黃閣之方雅而襍流不得參錯其間也卿寺皆有貳有副而左右分中書則以入閣之歲月爲前後輩舍人亦依此例宰相與宰相爲一輩舍人與舍人爲一輩晉侍讀轉典籍卽極之官政地而終身不能易所以重清流之選在雲霄日月之旁資秩之崇卑不計也唐虞官百司空后稷內言典樂皆起於堯時而立相始黃帝其制最古調元贊化論道經邦宏鹽梅舟楫之用負霖雨蒼生之望而道濟天下者中書其政本也宜有專書以鋪張其盛事而隋以前無聞也唐李筌撰中台志宋曾致堯廣之馬宇撰鳳池錄尉遲偓撰中書故事賀蘭正元撰輔佐記柳芳撰大唐宰相表韋瑄

撰國相事狀張薦撰宰相傳畧蔣乂撰大唐宰相錄杜
儒童撰中書則例又有唐宰輔圖大唐宰相歷任記唐
宰相後記唐宰相錄不著撰人皆唐人所撰也而唐宰
相譜則宋李燾所作也燾又撰歷代宰輔年表譚世勣
撰本朝宰執表陳繹撰國朝宰相年表并續又撰宰相
拜罷錄繼此范冲蔡幼學皆有其書徐自明撰皇朝宰
輔編年錄而明呂光耀續之龔頤正撰元輔記劉顏撰
輔弼名對又有執政拜罷錄本朝宰相拜罷錄宰輔年
表熙豐宰輔年表嘉定宰相慶會圖不著撰人皆宋人
所撰也元則王恂撰中堂事紀明則陳朝璋撰宰相畧
謝鐸撰宰輔沿革雷禮撰內閣行實李載贄撰史閣萬

年而爲之傳記者吳震元有宋相傳魏顯國有歷代相傳王世貞有嘉靖以來首臣傳以上凡三十九種見於唐宋藝文志鄭樵通志中興館閣錄及元明傳記所言佚不傳者十之九矣真定梁慎可撰內閣小識內閣起於永樂時梁書祇言有明一代之制耳於歷史未之詳也吾友王君莪山出入省闈者幾二十年留心典故每逢倖直輒從各房搜考檔案勒成一書證之史冊有涉於中書者輒加甄錄其目有六曰官制曰職掌曰儀式曰恩遇曰建置曰題名而以雜錄終焉余前所臚陳之書今雖不可盡見而其制與其事尙存也 國朝泰階六符荃宰一德世則世法垂之永久聽其放失斯亦眊

筆者之羞而綸扉之闕事也且夫一書之作義寓勸懲
唐蘇瓌所以撰中樞龜鑑宋吳張翼所以撰宰輔明鑑
也是必身歷台鼎著書或可昭示炯戒舍人職非南董
萬不敢以筆削是非加諸元臣碩輔而題名一門人必
詳其顛末其以功名終者則於恩遇詳之其不克以功
名終者宋子京引易所謂鼎折足覆公餗其刑剗也天
命天討歸之於天而已不與焉老聃彭祖述而不作莪
山非其人哉其自序詳矣而復命余序余所知不能有
出於是書之外者引而伸之而知盡能索矣一得之愚
芻蕘之擇可以炫世不可以益莪山也莪山其謂我何

仁和杭世駿



序

雍正十三年冬余以乙科應內閣中書試其時同入選

者桐城馬相如

樸臣

歸安沈微涓

灑

錢塘陳勾山

兆崙

嘗欲編輯中書典故後勾山改翰林微涓陞宗人府相
如請假南旋皆有志而未逮嘗聞前輩博雅君子多有
鈔錄或入直未久隨卽遷轉是以卒成完書余見聞淺
陋且又健忘焉能肩此考訂之任乃自中書轉典籍先
後幾二十年中書各房周歷殆遍俛直之暇凡於列朝
檔案雖殘編斷簡沉沒於塵土中者莫不珍如拱璧日
覽手鈔殆無虛日丙子冬以久直量移佐理襄郡政務
清閒因取曩日所錄者分爲官制職掌儀式恩遇建置

題名六冊其餘有事關典故而六冊所不能附者別爲
襍錄一冊以收之因思證之於今自當考之於古凡史
冊所載有關於中書典故者皆彙紀焉凡稗官野史諸
子說部之書雖攷覈未盡精詳而逸事流傳頗多可採
惜楚北藏書之家崇尚樸實經史而外少所收藏歸田
後兩目昏眊艱於翻閱因就見聞記憶所及纂成七冊
非敢云補前人所不逮實以待後來博聞強記之士正
其訛補其闕以成中書典故之完書則此七冊爲彙紀
之初稿也可乾隆三十年歲次乙酉舊內史王正功

中書典故彙紀目錄

第一卷

官制

第二卷

職掌上

第三卷

職掌下

第四卷

儀式

第五卷

恩遇

第六卷

建置

第七卷

題名

第八卷

雜錄

中書典故彙紀卷一

嘉業

仁和王正

錢塘趙輯



官制

中書始於漢魏卽古宰相也古之宰相黃帝置三公虞舜設五等三公四輔殷湯立左右相周成王亦有左右相秦悼武之丞相始皇之相國漢成帝之司空大司馬哀帝之大司徒後漢之太尉後魏北齊之侍中後周之大冢宰隋之內史納言唐宋之三省长官左右僕射同平章事及秦漢有御史大夫唐有平章事唐宋有參知

政事元有平章政事以貳於相皆宰相職也其餘南北六朝以及唐宋元明各有中書省至洪武十三年罷中書省永樂間開內閣於東角門設殿閣大學士學士等官而中書舍人之名相沿不改故并錄之起自漢魏遡中書之所由始也附以周秦以前取名異而實同耳

中書之任其所置中書之名因漢武帝遊宴後庭始以宦者典事尙書謂之中書謁者置令僕射元帝時令弘恭僕射石顯秉勢用事權傾內外蕭望之以爲中書政本宜以賢明之選更置士人自武帝故用宦者掌出入奏事非舊制也成帝建始四年改中書謁者令曰中謁

者令更以士人爲之皆屬少府漢東京省中謁者令官
魏武爲魏王置秘書令典尙書奏事文帝黃初初改爲
中書令又置監以秘書左丞劉放爲中書監右丞孫資
爲中書令並掌機密中書監始於此也晉因之置令監
一人始皆同車後乃異焉東晉嘗併其職入散騎省尋
復置之宋與晉同梁中書監令清貴華重大臣多領之
其令舊遷吏部尙書才地俱美者爲之陳因梁制後魏
亦有監令北齊因魏制後周置內史中大夫二人隋初
改中書爲內史置監令各一人尋廢監置令二人煬帝
大業十二年又改內史爲內書後復爲內史令唐武德
初爲內史令三年改爲中書令亦置二人龍朔二年改

爲右相咸亨元年復舊光宅二年又改爲內史神龍元年復舊中書令開元元年改爲紫薇令五年復爲中書令天寶元年改爲右相

文獻通考

漢置中書領尙書事有丞郎魏黃初初中書旣置監令又置通事郎後改通事郎爲中書侍郎晉宋齊梁皆四人梁以功高者一人主省內事陳因之後魏北齊置四員隋初爲內史侍郎亦四員煬帝減二員改爲內書侍郎唐初爲內史侍郎武德三年改爲中書侍郎龍朔以後隨省改號而侍郎之名不易

同上

中書舍人秦爲尙書郎漢內史舍人魏中書通事舍人晉宋齊如魏制梁陳中書舍人爲政府要官始去通事

之名北齊舍人省屬中書隋內史舍人唐中書舍人高宗改西臺舍人武后改鳳閣舍人元宗改紫薇舍人宋如唐制有舍人院屬中書神宗後謂之中書後省

閱史

約書

按周禮地官有舍人上士二人掌宮中之政舍人之名始此

魏改蘭臺令曰秘書又改中書至晉以中書統秘書

詞

林典故

魏置中書通事舍人或曰舍人通事各爲一職晉江左乃合之謂之通事舍人宋初又置中書通事舍人四員齊永平初中書通事舍人四員各住一省時謂之四戶

權傾天下與給事中爲一流梁用人殊重簡以才能不限資地多以他官兼領後除通事字直曰中書舍人陳置五人後魏有舍人省而不言其員北齊舍人省領舍人十人後周有小史上士二人此其任也屬春官隋內史舍人八員煬帝減四員後改爲內書舍人唐初爲內史舍人至武德三年改爲中書舍人置六員龍朔以後隨省改號而舍人之名不易

文獻通考

按隋書云其後除通事直日中書舍人

魏明帝太和中詔置著作郎於此始有其官隸中書省及晉受命武帝以繆徵爲中書著作郎元康二年詔曰著作舊屬中書而秘書旣典文籍宜改中書著作爲秘

書著作於是改隸秘書省後別自置省而猶隸秘書著作郎一人謂之大著作郎

晉書百官志

晉中書監令並置一人中書侍郎四人按魏黃初初中書既置監令又置通事郎次黃門郎黃門郎已署事過通事乃署名已署奏以入爲帝省讀書可及晉改曰中書侍郎員四人中書侍郎蓋此始也及江左初改中書侍郎曰通事郎尋復爲中書侍郎

同上

晉惠帝永寧元年罷丞相復置司徒永昌元年罷司徒并丞相則與司徒並不置矣其後或有相國或有丞相省置無恆而中書監令常管機要多爲宰相之任自魏晉以來相國丞相多非尋常人臣之職唐世宰相名尤

不正初唐因隋制以三省之長中書令侍中尙書令共
議國政此宰相職也其後以太宗嘗爲尙書令臣下避
不敢居其職由是僕射爲尙書省長官與侍中中書令
號爲宰相其品旣崇不欲輕以受人故常以他官居宰
相職而假以他名自太宗時杜淹以吏部尙書參議朝
政魏徵以秘書監參預朝政其後或曰參預得失參知
政事之類其名非一皆宰相職也

文獻通考

按隆平集敘宰執云僕射侍中皆秦官僕役於射謂
之僕射侍中則丞相之史耳抗之以爲宰相名同而
實異矣

居易錄

晉初置舍人通事各十人江左合舍人通事謂之通事

舍人後省之而以中書侍郎一人直西省

晉書職官志

按宋書百官志云晉初置舍人一人通事一人

晉武帝以秘書并中書省監謂丞爲中書秘書丞

宋書

百官志

宋中書令一人中書舍人一人中書侍郎四人中書通事舍人四人置通事舍人而侍郎之任輕矣舍人直閣內隸中書其下有主事本用武官宋改用文吏

同上

按宋中書監令在第三品中書侍郎在第五品而獨不著舍人之品志末云凡新置不見此諸條者隨秩位所視然則宋時中書舍人在令下侍郎上當是第四品也

宋中書侍郎用散騎常侍爲之

文獻通考

齊中書監一人令一人侍郎四人通事舍人無員中書

省職置主書令史正書以下

南齊書

梁中書省置監令各一人侍郎四人又有通事舍人主

書令史等員

隋書百官志

梁武定十八班以班多者爲貴中書監爲十五班中書

令爲十三班中書侍郎爲九班中書舍人爲四班中書

監品第二中書令品第三中書侍郎品第四中書舍人

品第七

隋書百官志

陳承梁皆循其制國之政事並由中書省有中書舍人
五人領主事十人書吏二百人書吏不足并取助書分

掌二十一局事各當尙書諸曹並爲上司總國內機要而尙書惟聽受而已被委此官多擅威勢 同上

陳中書監品第二中書令品第三中書侍郎品第四中書通事舍人品第八 隋書百官志

魏氏官號多同於晉真君五年正月侍中中書監宜都王穆壽司徒東郡公崔浩侍中廣平公張黎輔政置通事四人太和中高祖詔羣僚議定百官著於令中書監在從第一品中書令在第二品中中書侍郎在第四品上中書舍人在從第六品上二十三年高祖復次職令及帝崩世宗初班行之以爲永制中書監從第二品中書令第三品中書侍郎 上階從第四品中書舍人第六品

按從品之制自此始

魏收崔鴻本傳云崔光以魏高祖太和中拜中書博士十六國春秋

後齊制官多循後魏中書省監令各一人侍郎四人又領舍人省中書舍人主事各十人

隋書百官志

後齊中書監從第二品中書令第三品中書侍郎從第四品中書舍人第六品

同上

隋高祖既受命改周之六官其所制名多依前代之法內史省置監令各一人尋廢監置令二人侍郎四人舍人八人通事舍人十六人主書十人錄事四人

同上

按隋室諱忠而中與忠同音故改爲內史

隋大業三年更定官制殿內省與尙書門下內史秘書

爲五省 通鑑

煬帝卽位內史省減侍郎員爲二人減內史舍人員爲

四人加置起居舍人員二人 從六品次舍人下改通事舍

人員爲謁者臺職減主書員置四人加爲正八品十二

年改內史省爲內書 隋書百官志

隋初廢周制唯以中書爲內史侍中爲納言 同上

內史令正二品內史侍郎正四品內史舍人正六品通

事舍人從六品主書從八品 同上

開皇三年內史舍人並加爲從五品增置通事舍人十

二人通舊爲二十四員 同上

隋煬帝以爲古有內史外史今著作如外史矣宜置起居官以掌其內乃於內史省置起居舍人二員次內史舍人下 文獻通考

唐中書省令二人正二品侍郎二人正三品舍人六人正五品右散騎常侍二人右諫議大夫四人左補闕六人右拾遺六人起居舍人二人從六品上通事舍人十人亦從六品上 唐書百官志

中書令舊班正三品大厯二年升爲從二品 通志

唐初始合中書門下之職故有同中書門下三品開元書門下平章事其後又置政事堂蓋以中書出詔令門

下掌封駁日有爭論紛紜不決故使兩省先於政事堂
議定然後奏聞開元中張說奏改政事堂爲中書門下
自是相承至於國朝莫之能改非不欲分也理勢不可
復分也向日之所謂中書者乃中書門下政事堂也

文獻通考

唐制宰相四人首相爲太清宮使次三相皆帶館職昭
文館大學士監修國史集賢殿大學士以此爲次序

唐武德五年復置諫議大夫屬門下省龍朔後又置屬
中書省開元以後復屬門下省

貞觀八年僕射李靖以疾辭位詔疾小瘳三兩日一至
中書門下平章事而平章事之名蓋始於此其後李勣

以太子詹事同中書門下三品謂同侍中中書令也而
同三品之名蓋起於此然二名不專用而他官居職者
猶假名如故自高宗以後以爲宰相者必加同中書門
下三品雖品高者亦然惟三公三師中書令則否其後
改易官名而張文瓘以東臺侍郎同西臺三品同三品
入銜自文瓘始永澤元年以黃門侍郎郭待舉兵部侍
郎岑長倩等同中書門下平章事平章事入銜自待舉
始自是以後終唐之世不能改初三省長官議事於門
下省之政事堂其後裴炎自侍中遷中書令乃徙政事
堂於中書省開元中張說爲相又改政事堂號中書門
下列五房於後一曰吏房二曰樞機房三曰兵房四曰

戶房五曰刑房分曹以主眾務焉

春明夢餘錄

高宗欲用郭待舉等謂中書令崔知溫曰待舉等資任
尙淺且令與聞政事未可與卿等同名自是外司四品
以下知政事者以平章事爲名

通鑑

龍朔二年以侍中爲左相中書令爲右相僕射爲匡政
左右丞爲蕭儀尙書爲太常伯侍郎爲少常伯

唐武德初李勣任左僕射以南省務疏於北省始命帶
中書門下三品並平章事者爲眞宰相其宰相僕射不
帶同三品者但釐尙書省務而已貞觀至德間置左右
相又有知政事參議朝政參知政事參知機務皆宰相
之稱也

唐顯慶中復於中書省置起居舍人遂與起居郎分掌左右宋沿唐制起居郎隸門下起居舍人隸中書號小兩省

文獻通考

唐太宗始置起居郎於門下省高宗又置起居舍人於中書省時謂之左右史

稗史

唐置門下省起居郎二人中書省起居舍人二人

唐書

唐置門下省校書郎二人中書省校書四人正字二人同上

唐秘書省隸中書如晉制

詞林典故

唐弘文館隸門下省集賢院隸中書省

同上

開元以來左右補闕拾遺各二左屬門下省右屬中書

省 山堂肆考

唐制節度使加中書門下平章事爲使相自郭元振始
李光弼等繼之蓋平章政事宰相之名以節度使兼權
故云爾也 石林燕語

唐以尙書門下中書秘書殿中內侍爲六省 山堂肆考

唐太宗時始有同中書門下三品時中書令侍中皆正
三品大庠中並升爲二品晉天福五年升中書門下平
章事爲正二品國初樞密使吳延祚以父諱璋加同中
書門下二品用升品也 春明退朝錄

後唐長興四年以馬贊父名 不欲斥其宗諱改同平
章事爲同中書門下三品 池北偶談

後晉開運元年詔翰林學士與中書舍人分爲兩制各

置五員 文獻通考

吳有中書省中書令侍郎知制誥中書舍人通事舍人

南唐有中書省 貶制改內 中書令 判中 侍郎 後改內 知

制誥右散騎常侍右諫議大夫右補闕右拾遺中書舍

人 後改內 起居舍人通事舍人前蜀有中書省 判中書

中書令侍郎知制誥右散騎常侍右諫議大夫右補闕

後蜀有中書省中書令侍郎知制誥右散騎常侍右諫

議大夫中書舍人南漢有中書令侍郎知制誥中書舍

人楚有知制誥吳越有中書令 承制加 侍郎右補闕閔

有中書省中書令侍郎右散騎常侍右諫議大夫中書

舍人鳳閣舍人內學士荆南無北漢有中書省中書令
侍郎右諫議大夫中書舍人通事舍人 十國春秋

吳有大丞相同平章事參政事 參知政事 南唐有左丞相平

章事 同平章事 前蜀有宰相同平章事後蜀有同平章事南

漢有平章事 同平章事 知政事參知政事楚有左相右相左

丞相右丞相同平章事吳越有左右丞相同參相府事

進侍闕有平章事 同平章事 參知政事判三司 侍判錄軍國

事北漢有宰相平章事 同平章事 參議中書惟荆南不設 同

上

宋置中書省設官十有一令侍郎右散騎常侍各一人
舍人四人右諫議大夫起居舍人右司諫右正言各一

人分房八曰吏房曰戶房曰兵禮房曰刑房曰工房曰生事房曰班簿房曰制敕庫房元祐以後析兵禮爲二增催驅點檢分房十有一又改生事房爲開析

文獻通考

宋朝設官之制名號品秩一切襲用唐制然三師三公不常置宰相不專用三省長官中書門下並列於外又別置中書於禁中是謂政事堂與樞密院對掌大政

同上

宋承唐制以同平章事爲宰相之職無常員有二人則分日知印以丞郎以上至三師爲之其上相爲昭文館大學士監修國史其次爲集賢大學士或置三相則昭

文集賢兩學士監修國史並除焉同上

按春明退朝錄本朝置二相昭文修史首相領焉集賢次相領焉三館職惟修史有職事而頗以昭文爲重自次相遷首相乃得之趙令初拜止獨相領集賢殿大學士續監修國史久之方遷昭文館薛文惠與沈恭惠並相薛自參政領兼修拜相仍舊而沈領集賢畢文簡與寇忠愍並相而畢領監修寇領集賢王太尉獨相亦止領集賢近時王章惠龐莊敏初拜及獨相悉兼昭文修史二職非舊制也

國朝范魯公

質

王文獻

溥

魏宣懿

仁浦

秉鈞

史館昭文

集賢三相俱全太宗初年薛文惠

居正

沈恭惠

倫

盧

多遜 真宗咸平二年李文靖沈向文簡敏中呂文穆蒙

正仁宗至和三年劉文忠沈文潞公彥博富鄭公弼元

祐初司馬溫公為左僕射文潞公平章軍國重事呂正

獻同平章軍國事皆三相也至三年溫公薨文呂二公

在位而呂汲公大防范忠宣純仁為左右僕射殆四相

然不久也揮塵錄

宋太祖以趙普獨相欲置副而難其名稱問陶穀曰下

宰相一等有何官曰唐有參知政事乃以薛居正呂餘

慶參知政事通鑑

祖宗故事宰相去位因除本官稍優則進官一等

東宮三少惟趙韓王以開國舊臣且相十年故以使相

罷蓋異恩也自是迄太宗真宗世皆不易舊制天聖初
馮魏公以疾辭位始除武勝軍節度使宰相建節自魏
公始明道末呂申公罷仁宗眷之厚始復加使相蓋自
韓王以來申公方繼之其後王文惠陳文惠罷日相繼
除遂以爲例宰相除使相自申公始景祐末王沂公罷
相除資政殿大學士判鄆州宰相除職自沂公始至皇
祐賈文元罷除觀文殿大學士自是遂以爲例蓋自非
降黜皆建節或使相爲優恩加職名爲常例迄今不改
也

石林燕語

資政觀文二小殿橫列禁中宰相出鎮帶資政殿大學
士執政無大字蘇易簡出鎮被遇獨厚遷紫宸之目以

稱呼不便更用觀文因此宰執出鎮則除之

西溪叢語

王珪爲首相蔡確爲次相確奏乞以首相兼門下侍郎次相兼中書侍郎其實以唐制有中書造命之說於是奏取旨皆次相而首相並不得預蓋陰傾珪而奪之權

文獻通考

本朝沿習唐制官制行始用六典別尙書門下中書爲三省各以其省之長官爲宰相則侍中中書尙書令是也旣又以秩高不除故以尙書令之貳左右僕射爲宰相而左僕射兼門下侍郎以行侍中之職而別置侍郎以佐之則三省互相兼矣

石林燕語

國朝未改官制以前異姓未有兼中書令者唯贈官有

之元豐中曹郡王以元舅特除兼中書令

夢溪筆談

按沈括筆談謂有司以佾新命言自來不曾有活中書令

宋中書令未嘗真拜以他官兼領者不與政事然止曹佾餘皆贈官官制行以右僕射兼中書侍郎行令之職別置侍郎以佐之元豐寄祿爲開府儀同三司

文獻通考

宋置中書侍郎掌貳令之職官制行以尙書右僕射兼又別置侍郎以代參知政事建炎初復改侍郎爲參政侍郎

同上

唐制官序未至而以他官權攝者爲直官如許敬宗爲

直記室是也國朝學士舍人皆置直院熙寧中復置直舍人學士院但以資淺者爲之其實正官也熙寧六年舍人皆遷罷閣下無人乃以張子平權知制誥而不除直院者以其暫攝也古之兼官多是暫攝有長兼者卽同正官予家藏海陵王墓誌謝朓文稱兼中書侍郎

夢
溪筆談

宋起居郎隸門下省起居舍人隸中書省元豐官制行分郎與舍人爲左右又稱左右史

詞林典故

元豐五年詔中書舍人印爲中書後省之印曾鞏陸佃並試中書舍人自是始正官名

文獻通考

宋熙寧時詔中書五房各置檢正二員在堂後官之上

都檢正一員在五房提點之上皆以士人爲之

石林燕語

元豐五年官制行罷檢正職務分歸中書舍人給事中

左右司郎中

續會要

建炎三年軍興多事欲差官兩員充中書門下省檢正諸房公事一員檢正吏禮兵房一員檢正戶刑工房位序左右司上於都堂置直舍從之四年罷紹興二年詔復置一員

中興會要

按宋史百官志云檢正官五房各一人熙寧三年置以京朝官充選人卽爲習學公事官制行罷之而其職歸左右司建炎三年中書門下省言軍興以來天

下多事中書別無屬官元豐以前有檢正官後因置左右司遂不差致朝廷及應報四方行移稽留無檢舉催促今欲差官兩員充中書門下省檢正諸房公事從之至次年詔並罷紹興二年中書門下省復置檢正官一員建炎三年中書門下省併爲一中書省錄事主事令史書令史守當官共四十三人門下省共四十六人依祖額以八十九人爲額隸闕守當官兩省各一百人共存留一百五十人中書省六分門下省四分

又按九朝通畧云元祐元年三省言中書置刑房檢正官從之獨刑部員外郎劉賡以爲不可而止

元豐初詔檢正官檢詳官各以四員爲額亦同都事錄事承旨分房掌管其品秩尙卑政和更制品秩甚高各置一員通掌諸房權任甚重而所以擢用者不同或出於人主親擢則宰執反憚之所請不敢不從出於宰臣進擬則人主反疑之因是品位不進近世日宰屬樞屬官爲旋窩人不以爲其人主親擢則又有跳出旋窩之號頗恃以自矜矣

燕翼貽謀錄

祖宗重堂後官更用士人新法旣行增置宰屬而士流不復爲堂後官

同上

本朝宰相以三師致仕者元豐以前惟三人趙韓王太師張鄧公太傅王魏公太保元豐末文潞公始以太師

繼之 避暑錄話

元豐官制罷平章政事名而以開府儀同三司易之亦帶節度使謂之使相蓋以儀同爲相也 石林燕語

元祐初以蘇軾直舍人院有司言自官制行舍人院廢今爲中書後省於是改爲權中書舍人遂爲故事 文獻通考

按嘉泰四年李季章 璧以宗正少卿權中書舍人而中字犯祖諱季章辭有旨權以直舍人院繫銜乃受命不知舍人院廢已久矣蓋大臣失於討論也

又按文獻通考云紹興初詔以他官兼攝者稱權直資淺者爲直舍人院則自紹興初已復設直舍人院

矣

國朝兩制皆避宰相執政官親曾魯公修起居注賈文元爲相其友壻也當召試乃除天章閣待制文元去位始爲知制誥劉元甫王文定甥文定之爲參知政事乃以侍讀學士出知揚州宋子京王元叔爲翰林學士子京避莒公改龍圖閣學士原叔文安改侍讀學士元祐間蘇子由秉政子瞻白揚州召爲承旨引劉原叔例請補外不從近歲惟避本省官如宰相二丞親則不除尙書侍郎門下侍郎親則不除給事中中書侍郎親則不除舍人之類六曹尙書避親多除翰林學士蓋以三省無所隸異於舊制自子瞻以來然也

石林燕語

仁宗皇祐二年詔后妃之家毋得除二府職任 宋史

元豐四年詔在京官毋得舉執政有服親 同上

趙中令爲相李處耘爲樞密副使處耘之女爲中令子婦並居二府不避姻家皇祐中文潞公爲相程康肅爲樞密副使熙寧中王荆公爲相吳正憲爲樞密副使皆不避 石林燕語

蔡京當國更兩省之長爲左輔右弼易端揆之稱爲太宰少宰 宋史百官志

政和中改左右僕射爲太宰少宰仍兼兩省侍郎靖康中復爲左右僕射建炎三年呂頤浩參酌三省之制舊尙書左僕射今欲尙書左僕射同中書門下平章事舊

尙書右僕射今欲尙書右僕射同中書門下平章事門下中書二侍郎並改爲參知政事廢尙書左右丞從之

文獻通考

按宋史百官志云元豐新官制廢參知政事置門下中書二侍郎尙書左右丞以代之建炎三年以復門下中書二侍郎爲參知政事而省左右丞

左諫議大夫隸門下右諫議大夫隸中書

文獻通考

元豐新官制職事官未有不經除授者惟御史大夫左右散騎常侍始終未嘗除一人蓋兩官爲臺諫之長無有啟之者中興初詔諫院不隸兩省紹興二年詔並依舊赴三省元置局處淳熙十五年用林栗言置左右補

闕拾遺專任諫正不任糾劾之事踰年減罷法司令史
書令史守當官各一守闕守當官三人乾道六年減二
人 宋史百官志

中興置中書省以中書舍人爲長官六員常除二員一
員領吏房及兵工房一員領吏房右選及禮刑房 同上
建炎三年重正三省官名自元豐肇建三省皆不置長
官以左右僕射兼兩省侍郎二相既分班進呈首相遂
不與朝廷議論至是從呂頤浩之言詔左右僕射並同
中書門下平章事中書門下侍郎爲參知政事省尙書
左右丞三省始合爲一 通鑑

乾道八年詔尙書左右僕射可依漢制改作左右丞相

詳定敕命所言近詔旨改左右僕射爲左右丞相令刪
去侍中中書尙書以左右丞相充緣舊僕射非三省長
官故爲從一品今左右丞相係充侍中中書尙書令之
位卽合爲正一品從之丞相官以大中大夫以上充參
政以中大夫以上充常除二員或一員嘉泰三年始除
三員

文獻通考

按宋史百官志云中興後置左右丞相省令不置
中書故事小兩制未有除執政者乾道二年蔣子禮蒞
始自中書舍人除簽書樞密院事

朝野雜記

遼南面中書省有中書令大丞相左右丞相知中書省
事中書侍郎同中書門下平章事參知政事

續文獻通

考

中書省初名政事省太祖置官世宗天祿四年建政事
省興宗重熙十三年改中書省有中書令有大丞相有
左丞相有右丞相有知中書省事有中書侍郎有同中
書門下平章事有參知政事有主事有守當官有令史
遼史百官志

中書省所屬中書舍人院有中書舍人亦改名政事舍
人續文獻通考

金中書省 同上

按金史百官志熙宗頒新官制大率循宋遼之舊
遼正隆元年罷中書省是其初固常有之也

又按百官志云金左右丞相參知政事等官俱屬尙書省列尙書令下

元太宗三年八月始立中書省改侍從官名考續弘簡錄云太祖設官甚簡斷事官曰紮魯忽赤任至重位三公上丞相謂之大必閣赤掌兵柄

續文獻通考

按筆塵云大必閣赤必閣赤字音疑卽今之筆寫記蓋主文之稱故以爲丞相之稱

右丞相左丞相統六官率百司居令之次令闕則總省事佐天子理萬幾左右各一人國初職名未創太宗始置左右丞相各一人世祖中統元年置丞相一人二年復置左右丞相各二人至元二年增置丞相五人七年

立尙書省置丞相三人八年罷尙書省乃置丞相二人
二十四年復立尙書省其中書省丞相二人如故二十
九年再罷尙書專任一相武宗至大二年復置尙書省
丞相二人中書丞相二人四年尙書省仍歸中書丞相
凡二人自後因之不易文宗至順元年專任右相其一
或置或不置順帝元統三年七月中書省奏請自今不
置左丞相十月命伯顏長臺司詔天下至元五年十月
加右丞相伯顏爲大丞相六年十月命脫脫爲右丞相
復置左丞相至正十三年六月命皇太子領中書令如
舊制二十七年八月以太尉帖里木兒爲添設左丞相

同上

按百官志云元左右丞相等官屬中書尙書二省

中統元年置平章事二人二年增置四人至元七年置尙書省設尙書平章二人八年尙書併入中書平章復設三人二十三年詔清冗職平章汰爲二人二十四年復尙書省中書尙書兩省平章各二人二十九年罷尙書省增中書平章爲五人而一人爲商議省事三十年又增爲六人成宗元貞元年改商議省事爲平章軍國重事武宗至大二年再立尙書省平章三人中書五人四年罷尙書省歸中書平章仍五人文宗至順元年定置四人自後因之順帝至正七年置議事平章四人二十七年八月以樞密知院蠻子爲添設第三平章事

同

上

右丞左丞副宰相號左右轄各一人中統二年置三年
增爲四人至元七年立尙書省中書右丞左丞仍四人
八年尙書并入中書省右左丞各一人二十二年汰冗
職右左丞如故二十四年復立尙書省右左丞各一而
中書缺員二十八年復罷尙書三十年設右丞二人而
一人爲商議省事武宗至大二年復立尙書省右左丞
二人中書右左丞五人四年罷尙書右左丞中書右左
丞止設四人文宗至順元年定置右左丞各一人順帝
至正十二年二月以賈魯爲添設左丞八月以哈麻爲
添設右丞十四年九月以呂思誠爲添設左丞

同上

參政副宰相其職亞於右左丞官二人中統元年始置
參政一人二年增爲二人至元七年立尙書省參政三
人八年尙書併入中書參政二人二十三年汰冗職參
政二人如故二十四年復立尙書省參政二人中書參
政二人二十八年罷尙書省參政武宗至大二年復置
尙書省參政二人中書參政二人四年尙書併入中書
省參政三人文宗至順元年定參政爲二人順帝至正
十二年三月以悟良哈臺爲添設參政七月又以杜秉
彝爲添設參政

同上

右丞相左丞相正一品平章政事從一品右左丞正二
品參政從二品參議中書省事正四品右左司郎中正

五品員外郎正六品都事正七品斷事官正三品客省
使正五品副使正六品檢校正七品照磨正八品管勾
架閣庫管勾俱正八品 元史

參議中書省事典左右司文牘為大曹之管轄其治曰
參議府中統元年始置一人至元二十二年累增至六
人大德元年止置四人後遂為定額 同上

左右司郎中各二員員外郎各二員都事各二員中統
元年置左右司至元十五年分置兩司 元史百官志

元平章政事掌機務貳丞相官四人 續文獻通考

元世祖大新制作命劉秉忠許衡定內外之官其總政
府者曰中書省 元史百官志

元中書省有中書令一人太宗以相臣爲之世祖以皇太子兼之至元十年立皇太子行中書令大德十一年武宗卽位以皇太子行中書令延祐三年復以皇太子行中書令置屬監印二人

續文獻通考

中書省椽屬監印二人有中書令則置知印四人怯里馬赤四人蒙古必閣赤二十二入左司十六人右司六人漢人省椽六十人左司三十九人右司二十一人回省椽十四人左司九人右司五人宣使五十人省醫三人玉典赤四十一人斷事官國初嘗以相臣任之其名甚重其員數增損不常中統元年置三十一員至元六年置三十四員七年置三十五員八年始給印二十

七年分立兩省而斷事官隨省並置二十八年置三十六員併入中書三十一年增二員後定置四十一員首領官經歷一員知事一員吏屬蒙古必闍赤二人令史十二人回回令史一人怯里馬赤二人知印二人奏差八人典吏一人

中書省椽屬 斷事官國初嘗以宰臣任之其名甚重其員數增損不常至元八年始給印二十七年分立兩省隨省並置二十八年併入中書其首領官經歷二員知事一員又客省使四員副使二員至元九年置使二員一員兼通事一員不兼大德元年增置四員副使一員又直省舍人二員至元七年始置後增至三十三員

檢校官四員照磨一員中統元年置二員至元八年省
爲一員管勾一員中統元年置二員至元三年定爲一
員架閣庫管勾二員至元三年始置三員其後增置員
數不一至順初定爲二員蒙古架閣庫兼管勾一員回
回架閣庫管勾一員 元史百官志

先是太祖承前制設中書省置左右丞相 正一品 平章政

事 從一品 左右丞 正二品 參知政事 從二品 以統領眾職置屬

官左右司郎中 正五品 員外郎 正六品 都事檢校 正七品 照磨

管勾 從七品 參議府參議 正三品 參軍斷事官 從三品 斷事經

歷 正七品 知事 正八品 都鎮撫司都鎮撫 正五品 考功所考功

郎 正七品 甲辰十月以都鎮撫司隸大都督府吳元年革

參議府洪武元年革考功所二年革照磨檢校所斷事
官七年設直省舍人尋改中書舍人洪武九年汰平章
政事十三年誅丞相胡惟庸遂罷中書省其官屬盡革
惟存中書舍人九月置四輔官尋亦罷十五年倣宋制
置華蓋殿武英殿文淵閣東閣諸大學士又置文華殿
大學士以輔導太子秩皆正五品建文中改大學士爲
學士悉罷諸大學士設學士一人又成祖特簡解縉等
改謹身爲正心設正心殿學士直文淵閣不置官屬世宗時三殿成改華蓋爲中極謹
身爲建極閣銜因之

明史職官志

按稗史云漢武設蘭臺石渠二署置太史令掌天文
國史卽今東閣學士也又設秘書令掌秘書卽今文

淵閣學士也

中書省正一品初設左右相國洪武元年改左右丞相各一人左右丞各一人參知政事二人其屬左右司郎中各一人員外各一人都事各一人中書舍人二十人

吾學編

明初設右左相國吳元年命百官禮俱尙左改右相國爲左相國左相國爲右相國洪武元年改相國爲丞相

明史稿

明初設四部於中書省分掌錢穀刑名禮儀營造之務洪武元年始置吏戶禮兵刑工六部仍隸中書省十三年罷中書省

明史職官志

明太祖御奉天殿敕文武羣臣言自古三公論道六卿分職自秦始置丞相而亡漢唐宋因之雖有賢相然多小人專權亂政自今罷相設五府六部都察院通政司大理寺分理天下庶務彼此頡頏不敢相壓事皆朝廷總之以後嗣君不許立丞相臣下敢有奏請設者文武羣臣卽時劾奏處以重刑命翰林春坊官入看詳諸司奏啟平駁之平允則列名封進署曰翰林院兼平駁諸司文章某官某進其時召耆儒鮑恂張長年余詮至命爲文華殿大學士三人辭不就而命吏部尙書劉仲質檢討吳伯宗爲華蓋武英殿大學士翰林學士朱訥典籍吳沉爲文淵閣東閣大學士皆侍左右備顧問然不

得平章軍國事洪熙初設謹身殿大學士既又建弘文閣諭大臣曰卿等各有職務朕欲得學士端謹老儒數人日侍燕閒備顧問可咨訪以聞楊士奇等以翰林侍講王進蘇州儒士陳繼對命學士傳旨繼授五經博士掌閣事進佐之尙書蹇義舉學錄楊敬訓導何澄散實卽授敬編修澄給事中皆直弘文閣於是華蓋謹身武英三殿及文淵東閣俱有大學士

春明夢餘錄

閣員初無定額洪武初吳伯宗以武英殿大學士復爲翰林院檢討永樂初王文忠以庶吉士入翰林未幾召同王直入內閣書幾宜奏疏五年陞修撰十四年進侍講入閣在先授官在後嗣後始以翰林院銜直文淵閣

然惟胡廣以修撰楊榮以編修彭時商輅以修撰其他
黃淮以中書舍人楊士奇以齊王府審理副陳敬宗張
瑛以鄉舉金幼孜以給事中胡儼以知縣俞綱以審理
權謹以光祿署丞徐有貞以都御史李賢以主事王文
薛瑄以御史高穀以中書舍人劉宇曹元以知縣袁宗
高以長史楊一清以總督張璉方獻夫桂萼霍韜以主
事席書以戶侍許瓚以吏書夏言以給事中皆不由館
選自茲會推內閣冢宰掌院必列名至崇禎朝遂定爲
故事每次枚卜必內外兼權

春明夢餘錄

按弇州史料云桂文襄以知縣夏文愍以行人

方岳貢由監司召對稱旨授爲左副都御史翌日命以

本官兼東閣大學士故事閣臣冠都御史銜者岳貢一人而已

明史稿列傳

明世宗朝自許讚後外僚入閣者自張至發始

明史稿

入閣之先不帶翰林銜者王毅愍以左都御史江世用以刑部左侍郎俞綱以兵部右侍郎徐元玉以左副都御史許道中以太常卿薛文清以大理卿尹文和以兵部左侍郎焦孟陽以吏部尚書王文恪以右侍郎楊文忠以南京戶部尚書楊文襄許文簡俱以吏部尚書入若毅愍文清文襄文貞始終不由翰林尤爲特異俞綱劉至大僅一履任而已

王弇州史料

按憲章類編云內閣國初無拘出身之例成弘以來

乃以入閣必由翰林嘉靖間此制亦稍稍變矣

永樂初命編修等官於文淵閣參預機務謂之內閣漸
陞至學士諸職洪熙元年或加師保及尙書侍郎仍兼
學士大學士銜自後因之稱內閣大學士凡大學士加
三師則爲一品加尙書二品侍郎三品若未加陞而止
係大學士則仍正五品

詞林典故

本朝之有內閣輔臣自解縉始其有謹身殿大學士自
楊榮始輔臣之歷官至一品自楊士奇始官至一品入
內閣自王文始輔臣如楊士奇楊榮皆領三官陳循高
穀領五官矣然皆領戶工尙書其領吏尙亦自王文始
輔臣之有少師自楊士奇始士奇卒而少師之虛位者

四十餘年萬安亦登少師劉吉繼之自後劉健李東陽
楊廷和梁儲靳貴皆少師矣

憲章類編

明初閣臣大約初入為東閣進文淵又進武英以及謹

身今為建極華蓋今為中極惟文華則二百餘年來在永樂間權

謹以孝行舉拜文華殿大學士至萬曆三十五年加山

陰朱文懿公賡亦一奇也又殿閣遞進不相兼而高文

懿毅以謹身兼東閣王毅愍兼謹身東閣又一奇也

湧幢小品

永樂初內閣七人如解公輩初以六品後稍進為五品

而已宣德間三楊公及黃淮金幼孜並在閣俄黃移疾

去而進陳山張瑛凡六人景泰間陳公循高公毅王公

文俱以少保蕭公銜江公銜以太子少師商公輅以兵

侍隆慶初徐公階以少師李公春芳郭公朴以少傅高

公拱以少保而陳公以勤張公居正以尙書侍郎入董

前後滿六人者三人而已弇州盛事述

大學士五品也然多以尙書兼之洪熙元年楊文貞以

禮左侍兼華蓋金文靖以戶右侍兼武英宣德元年陳

山以戶左侍兼謹身張瑛以禮左侍兼華蓋後絕無之

至嘉靖中李公本以吏右侍兼東閣隆慶初張江陵以

吏左侍兼文淵萬厯中申公時行王公家屏以吏左侍

兼東閣俱大學士謹身殿大學士以太常卿兼者楊榮

武英殿大學士以通政使兼者黃淮蓋加官也學士以

刑部右侍郎兼者江淵以國子祭酒兼者蕭鎡以左副都御史兼者徐有貞由兼官進故也江蕭徐俱不數日而改

弁州異典述

太祖太宗時未嘗有師保加秩至洪熙朝始加張輔爲太師楊士奇爲少保進少傅楊榮爲太子少傅進少保後三楊俱進少師而夏原吉蹇義黃福亦加師保景泰間以易儲事文武大臣皆進師保之銜天順初悉革罷成化初復有加之者

憲章類編

仁宗朝始以楊士奇爲禮部侍郎尋加少保轉少傅兼華蓋殿大學士楊榮爲太常卿進太子少傅兼謹身殿學士楊溥爲太常卿兼翰林學士蓋不欲以兼官壓六

卿之上溥丁憂起復不入閣宣德間以九年考滿陞禮部尙書至英宗時復命入閣天順初李賢始以兵部侍郎陞吏部尙書兼翰林學士入閣成化弘治多由侍郎陞尙書入閣若先陞尙書則無入閣之命至正德初劉瑾以其私人焦芳吏部尙書入閣蓋以外僚之首入主中秘之權至張孚敬張居正則直以相體自尊危坐諸卿之上而名委之然兩文忠雖好高不懼絕利一源乃其具美

春明夢餘錄

按憲章類編云弘治四年冬十月命禮部尙書邱濬兼文淵閣大學士典機務先是召入閣者皆侍郎而下未有以尙書入者尙書入閣自濬始

按官制沿革云景泰以前至尙書不復入內閣弘正以後遂以尙書爲入閣之階梯

明設翰林學士及講讀學士而殿閣則設大學士其秩亦止五品旣重其任而又輕其秩遲其陞遷設官良有深意宣德後大學士始加保傅非制也

同上

明太祖下集慶以潘庭堅爲中書省博士

明史稿

按中書博士惟十六國春秋載魏高祖太和中拜崔光爲中書博士

內閣臣不由甲第者楊文貞以薦辟胡若思陳汝靜張子玉以鄉舉

史料

初設內閣楊文貞

上奇

歷二十三年官止五品後加至

少師止兼兵部尙書華蓋殿三官時蹇忠定義以少師

爲冢宰朝廷不欲文貞班居其上以存冢宰之體也陳

芳州循雖兼五官亦止戶部尙書後李文達賢以吏侍

領吏部尙書而彭文憲時商文毅略萬安相繼領吏部

尙書自後遂以爲首輔故事春明夢餘錄

直文淵閣所謂入閣辦事也仁宗設謹身殿大學士于

是大學士有華蓋謹身武英三殿及文淵東閣皆在內

閣曰辦事避丞相之名若東閣文淵閣大學士不得旨

入內閣亦不得預機務也吾學編

閣臣入閣止云直文淵閣及辦事而已惟徐有貞以武

功伯兼華蓋殿學敕掌文淵閣事遂以掌文淵閣入銜

後李賢以右侍郎復拜吏書兼學士奉旨亦掌文淵閣
然不入銜 弇州異典述

按春明夢餘錄云文淵閣未有言掌者徐武功有貞
以勳臣領之遂改爲掌文淵閣王世貞譏之以謂文
淵閣不可掌也吏部左侍郎李賢爲本部尙書兼翰
林院學士掌文淵閣事則又不止武功也又考解大
紳 縉 入閣居七人之首繫銜亦曰掌文淵閣則又不
始於武功也

大臣贈官獨內閣大學士及吏部尙書不與如梁武之
于朱異宋神宗之于韓琦非破例不可惟景泰中贈侍
郎曹鼐嘉靖初贈左長史張景明俱文淵閣大學士 弇

正統間以學士一人在內閣專管誥敕後久不設弘治七年復設至用尙書兼學士如石瑤侍郎兼學士如賈詠輩專管至嘉靖六年以張璁議始停不補

春明夢餘

錄

天順以前諸殿閣除文華不以授人凡五銜一兼其官者用師傅爲次序遂終身不復轉成化而後始以序遷矣然無有遍歷者惟近日申公時行始以吏侍兼東閣繼以禮書兼文淵三以戶書兼武英四以少傅吏書兼建極五以少師兼中極敝歷悉遍若歷三殿者則劉文穆而下多有之矣

弁州盛事述

內閣大臣皆特簡不從廷推至弘治始廷推其以吏部
尙書首推內閣而不得准用者弘治乙卯之耿裕正德
辛未之楊一清甲戌又復一清爲首嘉靖己酉之聞淵
萬麻甲申之楊巍皆不用而用翰林之次及後者 王弇
州史料

閣臣兼掌部院非舊規也焦泌陽呂餘姚不過數日嚴
常熟以候郭安陽得兩月嚴分宜徐華亭之掌禮部亦
以候代故張永嘉之掌都察院亦未嘗不推代也惟高
新鄭 拱 掌吏部起而入與閣務趙內江亦遂兼掌都察
院而局體一變矣 弇州史料

焦芳入閣仍欲兼部事劉瑾屢遣人來與李閣老 東陽

議李云無此例劉瑾云曾聞李賢兼管李云李賢是吏部侍郎入閣後陞尙書時王翱掌部事又問前有之乎答曰蹇義爲吏部尙書與戶部尙書夏原吉五日一赴東閣與大學士三楊議事未嘗兼大學士也次日吏部請印信內批令焦芳兼管部事芳以問李李曰某已言之此二事實難兼攝內閣佐天子出令吏部所擬陞調官間有可否今自擬之而自可否之耶又每日通政司奏事旨吏部知道者卽當廷跪承旨內閣班皆立聽今亦將出跪而更起立耶又部議差謬或章奏錯誤小則回話認罪大則罰俸脫有之亦將隨同認罪乎芳乃辭

部事

玉堂叢語又見
箸陂繼世紀聞

明代自南部入閣者甚少惟萬麻丁未葉文忠向高以

南京吏部侍郎徑授禮部尙書東閣大學士香祖筆記

按輔臣年表載楊文忠延和正德二年由南京戶部

尙書入閣梁文康儲正德五年由南京吏部尙書入

閣張文穆公治嘉靖二十八年由南京吏部尙書入

閣魏廣微天啟三年由南京禮部右侍郎陞禮部尙

書入閣

永樂五年十一月令內閣儒臣考滿吏部勿改外任按

永樂初內閣儒臣考滿陞任不在內閣如胡若思出爲

祭酒故有是命憲章類編

按鄭曉令言載內閣胡儼以考滿出爲祭酒故永樂

五年十一月諭蹇太宰義曰胡廣等侍朕日久繼今
考滿勿改外任

中堂考滿先一日典籍送咨至吏部大堂次日司務送
儀注至宅又次日典籍早候中堂至朝房俟司務迎請
到部照部送儀注行

內閣小識

兩房官考滿先具呈中堂批行掌院移文過部考稱復
職其九年者陞級有定例中堂仍擬職銜以示優劣

同上

成化四年十月辛亥少詹事兼學士柯潛奏比以災異
敕吏部都察院會同各衙門掌印官公同考察所屬各
官員本院屬官俱以文翰爲職侍讀等官彭華現在經

筵講讀及纂修實錄及帶俸郎中等官吳謙等并四夷館譯字官俱在內閣書寫誥敕翻譯外夷文字無事績文案可考乞如天順八年考察官員事例止令本院學士公同內閣學士考察詔從之時尙寶司左右春坊及六科給事中亦援此考察取旨詔皆留任事云

館閣漫錄

成化十三年七月辛未詔翰林院會同內閣自覈其官屬時考覈諸司官屬俱聽吏部都察院會覈而獨翰林以文學侍從爲職故聽其長自覈焉

同上

成化十四年令翰林院屬官并帶俸譯字官翰林院學士會同內閣考覈至弘治元年始令亦從吏部考察

明

按館閣漫錄云弘治元年三月戊子吏部言近奉考察京官凡五品以下俱在列今詹事府少詹事兼翰林院侍講學士汪偕具奏欲將本院侍讀等官并內閣書辦等官准成化十三年例自會內閣大學士考察乞賜裁斷上曰雖有本院考察舊例爾吏部仍會同翰林院印官考察

內閣設典籍二員管理一應事務遇缺於兩房官掄選嫻熟典儀勤敏端恪諳練者題補

內閣小識

馬端臨考中書省內有中書舍人宋史職官志據之而慶元以後無可攷者遼有中書舍人院屬中書省金不

設中書舍人元有直省舍人屬中書省若中書科之名始見於明永樂時蓋自洪武十三年罷中書省後特設此署與內閣所屬制誥東西兩房諸中書舍人職有攸分至今因之故改馬端臨中書舍人舊目爲中書科仍附中書省後

續文獻通考

明初丙辰始定中書舍人凡二十員正七品先是屬中書省後革七年改直省舍人從八品九年始定爲中書舍人正七品隸丞敕監監省革改從七品凡恩蔭寄祿及文華殿門東房內閣誥敕制敕分直者無定員建文中改侍書入文翰館靖難後復故

同上

楊一清曰中書舍人其選用進士外舉人與纂修書成

被恩典者乃得之監生儒士有勳勞大臣暨宮僚講官
有子孫宜承蔭敘奉特旨者乃得之用非輕矣

續文獻

通考

制誥兩房官無定額舊有三十餘員出入禁近辦理機
密文書其選甚重遇缺內閣具題吏部查訪各部及史
館四夷館等衙門職官及進士舉貢監內有文學優長
兼精書翰及性行謹恪者考選奏請改於吏禮二部帶
銜送內閣分撥辦事間或內閣裁奪查訪應補各官命
掌房典籍呈堂題補制敕房缺官則以誥敕房官題補
誥敕房缺官則以史館四夷館官題補

內閣小識

內閣有兩房制敕房爲東房誥敕房爲西房卽閣老屬

官其官有卿少卿司丞府丞郎中員外郎主事大理寺
寺正寺副評事中書舍人鴻臚寺主簿序班署丞等官
俸帶於列銜衙門實供事內閣擢至卿而止蓋由此上
卽爲侍郎都御史未有侍郎都御史尙爲屬閣老散官
也然亦有加至二品爲資政大夫者

稗史

宣德以來中書秩滿陞二級其於西敕房也止轉至五
品郎中等官則兼待詔侍書等銜如朱孔揚等皆見寵
任亦僅進四品散官耳正統間曹先生用事始授一二
太僕寺卿亞順天府丞亦未有假清卿者天順以來中
書滿則陞吏禮二部員外郎

瑣綴錄

正統後學士不能視誥敕悉委於中書序班譯字等官

嘉靖二十年選各部主事大理寺評事帶原銜直詣敕制敕兩房四十四年兩房員缺令吏部考選舉人爲中書舍人其直文華武英兩殿供御筆札者初爲內官職繼以中書分直後亦專舉能書者不必由部選自甲科監生生儒布衣能書者皆可爲之若兼官至九列其在科目者則出而爲卿佐以藝選者不過加服俸而已惟武世二廟稍有逾等至穆宗而始不爲限量其至尙書者三人禮部 駿工部周惠疇張文憲至侍郎者三人禮部張電工部談相王槐文憲官尙書時大學士李本爲侍郎然供事如初

瑣綴錄叅職官志

中書舍人有兩途由進士部選者得遷科道部屬不由

科甲者初授序班及試中書舍人不得遷科道部屬後

雖加銜九列仍帶銜辦事楷書出身者或加太常卿銜

林學士禮部 明史職官志
尚書銜者

兩房中書遷轉至嘉靖初年始由閣下題請識餘錄

隆慶四年吏部覆郭諫臣奏制誥兩房中書官不得陞

列九卿春明夢餘錄

萬厯元年定兩殿中書九年考滿官階至正五品止如

再有年勞止得加陞服俸同上

明初選進士為庶吉士分置近侍諸署若解縉為中書

庶吉士是也右見椒園雜記予池北偶談嘗記六科庶

吉士初未詳官制如何觀此乃曉然蓋中書六科皆近

侍也 居易錄

文華殿門東房別設中書舍人分直職專奉 旨書寫
書籍等武英殿門西房別設中書舍人分直職專奉

旨寫篆冊寶圖書冊頁內閣誥敕制敕二房中書不屬
中書科 春明夢餘錄

按春明夢餘錄云文華殿有直殿中書擇能書者居
之

明景順以後機務繁重而內閣制誥兩房中書舍人以
書辦供事朝夕卽古宰相屬也選用或由進士或由舉
人監生儒士以纂修効勞者亦得入始稱清華之秩 續

文獻通考

建文時文淵閣設典籍一人

憲章類編

建文時改中書舍人爲侍書以隸翰林院又設文淵待
詔及拾遺補闕等官成祖初復舊

明史職官志

景泰三年立懷獻太子詔始令署郎中員外郎主事試
中書實授

春明夢餘錄

古來兼銜皆以大兼小明初大學士學士皆五品加尙
書侍郎銜始爲二品三品故明初三楊輩結銜皆云某
部尙書兼某殿閣大學士今內閣結銜大學士于上而
曰兼某部尙書學士兼侍郎亦然與古制異

香祖筆記

國初設文館于盛京天聰十年三月改建內三院曰內
國史院內秘書院內弘文院順治元年三月增設三院

學士各一員二年三月定內三院爲二品衙門四月命翰林官由內院補授閏六月裁翰林院以歸內三院定內三院大學士二員爲二品學士四員爲三品六年正月更定內院官制三院各設學士一員十年六月增設三院漢大學士各二員十五年七月裁內三院改三院大學士爲殿閣大學士秩仍正五品十八年六月裁內閣翰林院復設內三院七月設內三院滿漢大學士各一員滿學士各二員漢軍漢學士各一員康熙八年七月裁三院滿學士各一員九年八月復改內三院爲內閣十月改三院大學士學士銜加殿閣大學士兼尙書

學士兼禮部侍郎

詞林典故

國朝官制設內三院曰國史曰秘書曰弘文院各有學士一員既設翰林院以內三院爲內閣則止設閣學二員而別以一人掌翰林院事俱兼禮部侍郎康熙十九年庚申乃有學士五員內閣徐元文李天馥掌院葉方霽而張英以講學內直特陞翰林院學士李光地以軍功超擢學士至是入京 陛見奉 特旨入閣四公皆兼侍郎葉則加尙書云 居易錄

國初置 文館後改爲內三院曰內國史院曰內秘書院曰內弘文院設大學士學士順治二年定爲正二品衙門以翰林官分隸內三院稱內翰林國史院內翰林秘書院內翰林弘文院增設侍讀學士侍讀等官九年

設典籍十五年改內三院爲內閣大學士兼各部尙書
銜學士兼禮部侍郎銜另設翰林院十六年只設大學
士及典籍撰文辦事中書裁學士侍讀學士等官十八
年後改內閣爲內國史院內秘書院內弘文院裁翰林
院康熙九年仍改爲內閣另設翰林院十年仍補授學
士以下等官其滿漢大學士員缺無定出自簡在滿學
士六員漢軍漢學士四員滿侍讀學士四員蒙古侍讀
學士二員漢軍侍讀學士二員滿洲侍讀十一員蒙古
侍讀二員漢軍侍讀二員滿洲漢軍漢典籍各二員滿
中書七十五員蒙古中書十九員漢軍中書十三員漢
中書三十六員康熙三十八年裁滿侍讀三員後復二
員共十二

員滿中書十一員蒙古中書三員漢軍中書五員漢中書四員雍正四年設漢侍讀二員詳見吏部官制

大清

會典

按曹習菴宰輔拜罷小志云內閣初設有承政參政理事官副理事官又有考取舉人生員入內院辦事順治中閣臣無定員自康熙元年至今二十年漢大學士止三人存內三院之舊也壬戌歲寶坻杜公臨胸馮公同致政歸而宛平王公以前兵部尙書大拜又兩月餘錢唐黃公以吏書漢陽吳公以禮書同日大拜始有四相前此癸丑歲李杜馮三公在內閣而孝感熊公以翰林學士大拜亦四相

池北偶談

按曹習庵宰輔拜罷小志云順治十八年正月 聖祖登極時大學士巴哈納金之俊額色黑洪承疇蔣赫德成克鞏傅以漸胡安世衛周祚李蔚共十八人四月洪承疇乞休六月傅以漸乞休七月以吏部尙書一伊圖爲弘文院大學士仍九人嗣後定漢大學士爲三員缺出不必逐員推補

康熙九年十月內院復爲內閣復翰林院官屬一遵順治十五年之舊以圖海巴泰爲中和殿大學士兼吏部尙書索額圖李蔚爲保和殿大學士兼戶部尙書魏裔介杜立德爲保和殿大學士兼禮部尙書對哈納爲文華殿大學士管刑部尙書事折爾肯哈占爲中和殿學

士塞赫達都爲保和殿學士馬朗古張鳳儀爲文華殿
學士靳輔爲武英殿學士田種玉爲文淵閣學士陳啟
永爲東閣學士俱兼禮部侍郎

拜罷小志

國朝入閣皆仍兼尙書銜惟康熙初益都孫文定公栢
鄉魏公前後俱以吏部尙書大拜而不兼尙書其後復
改內三院爲內閣魏公得兼禮部尙書文定則告歸久
矣池北偶談

本朝以學士大拜者二人高陽李公丙戌進士戊戌大
拜兼工部尙書孝感熊公戊戌進士乙卯大拜兼刑部
尙書李年三十四熊年四十一

同上

康熙中以尙書拜相者或進部銜如宛平王胥庭

熙相

國以司馬大拜而進兼禮部尙書京江張素存

玉書相

國以宗伯大拜而進兼戶部尙書是也其後吳沁州銅

川瑛以刑部尙書大拜止兼本部

香祖筆記

康熙辛未年漢軍學士年遐齡陞工侍漢學士彭孫通
陞吏部翰林讀學王揆講學李柟皆遷內閣學士舊制
學士滿洲六員漢軍漢人各二員至是漢人用三員與
掌院學士凡四員云

康熙丁未新例以內閣親切地勿用貲郎特遴進士有
才望者充其選

毛西河集

康熙元年以後閣部大臣無加官銜者壬戌十一月以
太宗文皇帝實錄告成加大學士勒公明公俱太子太

傅太子少傅保和殿大學士戶部尙書高陽李公太子
太師致仕大學士太子太傅保和殿大學士禮部尙書
賈抵杜公太子太師致仕文華殿大學士刑部尙書臨
胸馮公太子太傅故太子太傅中和殿大學士吏部尙
書圖公追贈少保仍兼太子太傅二十餘年所未有也
池北偶談

考之歷代設官皆稱中書舍人而本朝會典所載但云
滿漢中書而無舍人之稱漁洋雜錄曾有云見會試榜
姓名籍貫下填內閣中書是以省名名其官也

內閣侍讀缺出由中書揀選引 見補用按之品級考
及關支俸祿皆正六品而頂帶則同五品與員外郎一

體較俸陞轉內陞郎中外陞知府保送御史皆得與焉
乾隆間有以道員用皆特簡也

內閣漢中書三十二缺內有撰文四缺雖與辦事缺不
分職掌而獨不陞典籍典籍缺出則於辦事中書內揆
俸題管蓋中書之轉典籍不云推陞而云題管者以品
級考載中書爲從七品而典籍爲正八品不可以言陞
也乾隆二年由閣臣奏請奉 旨改爲正七品而題管
之文至今不改

按乾隆十三年裁漢中書二缺止存三十缺

乾隆三十六年吏部議准御史

奏撰文中書與辦

事中書一體題管典籍

按八旗通志滿洲漢軍以撰文辦事中書掌典籍事

推陞主事同知多由典籍而亦有由中書逕陞者撰文

中書是也

撰文中書不陞典籍

亦有由辦事中書推陞者以典籍

只二缺推陞至第三人則辦事中書亦得推陞矣

雍正初始以舉人考取內閣中書其按缺考補者不及

詳記至八年命鄂公

爾奇

楊公

汝毅

蔡公

世遠

會同閣

臣閱卷取金志章等五十五人引見用為中書者四

十三人十三年乙卯命來公

保

任公

蘭枝

邵公

基

方公

苞閱卷取陳兆崙等二十人乾隆二年丁巳命任公

蘭

枝孫公

嘉淦

等閱卷取蔣元益等四十人七年壬戌命

查公

郎阿

阿公

克敦

盛公

安

劉公

統勳

閱卷取沈作朋

等四十人十九年命楊公錫紱介公福襄公日修劉公

綸閱卷取諸重光等三十七人乾隆十六年 聖駕南

巡督撫學臣錄取獻詩賦者試於行在浙江取謝墉陳
鴻寶王又曾三人江南取蔣雍植錢大昕吳烺褚寅亮
吳志鴻五人皆特賜舉人授爲內閣中書學習行走與
考取人員一體補用以諸生足未厯帝都而授職清要
亦曠典矣其江南取中者尙有進士孫夢遠授爲內閣
中書遇缺卽補夢遠壬戌進士已就教職以外翰而進
中翰亦僅見也其後二十二年二十七年三十年 聖
駕南巡皆援例舉行

乾隆二十六年禮部議准大學士蔣文恪公條奏內閣

中書於會試薦卷內錄取引 見交部選用

乾隆三十三年六月吏部議覆御史蔣日綸條奏嗣後
中書缺出於進士朝考錄取未經簡用之試卷及會試
呈薦墨卷 派大臣彙總較核進士舉人相間輪用

乾隆七年江賑例開始有援例納粟人員與考取人員
間用之例然必由進士舉人出身者始得報捐

雍正十一年翰林院添設起居注主事一員遇缺于內
閣中書內揀選引 見補用

舊例考取補授內閣中書試俸一年實授後方准較俸
推陞孫紫靜中書樂云實授要週年與臺中同一般遭
遙試俸何曾算是也乾隆六年吏部纂修則例于推陞

時將所試之俸一并積算

內閣中書有兼司經局正字者明時設二員掌刊正文
字 國朝因之後止設一員掌繕寫講章及裝潢之事
以中書舍人兼之近日詹事府司經局無所職掌且正
字缺出仍于考取內閣中書內補授嘗有補司經局正
字而復留內閣辦事者是雖有正字之名而食俸陞轉
猶然中書也

乾隆三十六年吏部議准御史 奏裁去中書兼正
字之缺

中書科原設漢中書八員屬於內閣雍正間協辦大學
士尙書三公奏中書科中書除遇 覃恩書軸時在

本科辦事外餘俱令在內閣行走乾隆十三年裁四員
十八年奏派滿漢學士一員總其事以俸深者爲掌科
直房在六科之上

雍正以前大學士多有兼管部務者至乾隆初始不令
兼二年大學士張文和公復兼掌翰林院學士事旋兼
管吏部戶部後史文靖公兼管工部陳文勤公兼管禮
部來文端公兼管兵部傅忠勇公兼管吏部戶部而尙
書阿文勤公以大司寇協辦虞山蔣文恪公以大司農
協辦一時六部事務內閣無不兼之後文恪公大拜仍
兼管戶部

按曹習菴宰輔拜罷小志云順治十年二月以秘書

院大學士陳名夏兼管吏部尙書事是爲大學士兼部務之始順治元年六月令洪承疇以太子太保兵部尙書兼都察院右副都御史同內院官佐理機務是爲協辦大學士之始康熙二十八年以文華殿大學士徐元文兼管翰林院學士事是爲大學士兼掌院之始

雍正時有額外大學士如尹文恪公秦陳文簡公元龍

是也又有以尙書協辦大學士者乾隆十三年定滿漢大學士各二員其時三韓高公斌專管江南河道總督海寧陳公世倌以事去遂不復補而尙書協辦者如故內閣中書自雍正以來甲科與乙科並考其不由考取

用爲中書者韓御李以大宗伯文懿公葵之子因揀選知縣引 見用葉鳳毛以靖難葉映榴之孫 特召引見用孔繼汾因乾隆十三年 上謁孔林爲導引官奉 特旨用范清注以中書科中書奉 旨改補方觀承以隨平郡王出征奏請給內閣中書銜兵罷平邸還朝奏請實授

大學士桐城張文和公始由文淵閣進爲文華殿又進爲保和殿

順治五年定內三院滿洲大學士爲一品漢大學士以五品兼漢尙書爲二品

曹習菴宰輔拜罷小志

順治十五年除三院名色改爲殿閣大學士滿洲大學

士仍爲一品漢大學士仍以五品兼銜爲二品設學士侍讀學士侍讀等員

同上

順治十五年設中和殿保和殿文華殿武英殿學士各二人文淵閣東閣學士各一人並以禮部侍郎兼殿閣學士銜

同上

順治十六年庚子定內閣衙門只留殿閣大學士裁殿閣學士及侍讀學士各員是時議現在滿漢殿閣學士俱以原官留任缺出不補其滿官侍讀學士以下各員俱改爲中書仍照現在品級兼卿寺銜其典籍中書等員照舊置設

同上

康熙九年定滿漢大學士俱正二品兼各部尙書銜是

時各部尙書亦俱爲二品其後復定大學士爲正一品

尙書爲從一品 同上

康熙九年學士仍以禮部侍郎兼殿閣銜至十年始罷

兼殿閣銜稱內閣學士兼禮部侍郎 同上

康熙十年八月添設滿學士四人定設漢軍學士二人

漢人學士二人至十二年以漢軍漢人併爲漢缺共四

人滿字侍讀學士二人滿漢字侍讀學士二人蒙古侍

讀學士二人漢軍侍讀學士二人 至乾隆十七年改爲

資滿字侍讀四人滿漢字侍讀四人 至康熙十六年增

減三人 尋復增二人爲十人 蒙古漢軍漢人侍讀各二人其典籍中

書等員照舊置設 同上

附周秦以前宰相之制

黃帝置三公之秩以親黎元

晉書百官志

黃帝得六相而天下治

管子

記曰虞夏商周有師保有疑丞設四輔及三公不必備
惟其人語使能也故天子無爵三公無官參職天子何
官之稱

文獻通考

按舜設五等三公四輔之屬以師保疑丞爲四輔

成湯始置二相

通典

殷湯以伊尹爲右相仲虺爲左相秦悼武王二年始置
丞相丞奉相助也漢高帝十一年更名相國哀帝元壽
二年更名大司徒成帝世以王導爲丞相罷司徒府以

爲丞相導薨罷丞相復爲司徒府宋世祖初以南郡王
義宣爲丞相司徒而司徒如故

宋書百官志

漢武帝置丞相司直元壽二年改丞相爲大司徒司直
仍置建武二年有大司徒司直官

後漢書

秦置丞相總百揆又置御史大夫以貳於相光武廢丞
相與御史大夫而以三師綜理眾務洎於叔世事歸臺
閣論道之官備員而已

同上

秦悼武二年始置丞相以樗里疾甘茂爲左右丞相莊
襄王以呂不韋爲丞相及始皇立尊不韋爲相國則相
國丞相皆秦官秦初有左右丞相至二世復有中丞相
同上

秦置丞相省司徒漢初因之至哀帝元壽二年罷丞相
置大司徒後漢建武二十七年去大爲司徒公魏黃初
元年改爲司徒晉司徒與丞相通職更置迭廢未嘗並
立至永嘉元年始兩置焉宋制司徒亦與丞相並置齊
因之梁罷丞相置司徒歷代皆有後周以司徒爲地官
謂之大司徒卿隋及唐復爲三公宋仍舊制政和二年
罷遼金元詳太尉

淵鑑類函

漢沿秦制丞相缺御史大夫以次遷

居易錄

王莽居攝置四輔官

文獻通考

漢御史大夫副丞相事若今之同平章事及參知機務
之類所以漢書云薛貢韋匡迭爲宰相

同上

哀帝從朱博議始置三司改丞相爲大司徒以孔光爲之

淵鑑類函

東漢以三公爲三司鄧騭爲車騎將軍儀同三司自是江左以來有儀同之名

筆塵

漢以司馬司徒司空爲宰相蓋六國時有此三卿漢採用之但改司馬曰太尉殊不知周制六卿大國三卿三卿蓋諸侯之制漢人祇採六國之舊而不知周家天子故事失之矣

雲麓漫鈔

西漢所謂三公者丞相太尉御史大夫而已其後以大將軍代太尉而以大司馬號冠之然猶一官耳東漢承元成之舊以司徒代丞相司空代御史大夫司馬代太

尉爲三公而大將軍位三公之上與司馬爲二官矣曹
操爲丞相位三公上而丞相與司徒亦爲二官矣東漢
之末以太傅總百揆爲首相太尉次之司徒次之司空
次之而大將軍號或在太傅之下太尉之上有五公矣

中書典故彙紀卷一



